

**22 MARTIE**

**SLUJBA  
SF. IERARH-  
MUCENIC  
VASILE  
ZELENTOV  
AL PRILUKULUI**

**MINEIUL-RU**



# Служба

## священномученику

### Василию (Зеленцову),

### епископу Прилукскому

#### **НА МАЛЕЙ ВЕЧЕРНИ:**

На Господи, воззвах: стихиры, глас 3. Подобен: велия мученик твоих.

Велия мученика Твоего, Христе, сила:\* в нечисто бо место ввержен быв,\* испрашивает всем очищения,\* верно совершающим память его.

Велия крепость твоего, Василие, дерзновения:\* пред судом представ безбожных,\* низложил еси тех хуления,\* верою Троическою подвигся о благочестии.

Велия вера твоя, и славно благочестие;\* темже святому житию твоему страдание срастворив, священнейше,\* предстал еси Святей Троице,\* моляся за еже спасти град твой и вся люди.

Велий еси ты, Василие, мученик,\* и благочестив иерарх,\* и ходатай непостыден\* всем верою поющим тя.

Слава, глас 6. Самогласен:

Чудна во иерарсех,\* и светла в мученицех,\* воспеваем тя, Василие,\* любовью зовуще:\* радуйся, града нашего украшение,\* радуйся, веры укрепление,\* радуйся, любви Христовы сосуде,\* радуйся, пастырю добрый,\* радуйся, отче треблаженнейший,\* не престай моляся о всех нас.

На стиховне: Стихиры, глас 8. Самогласны:

Христовы словеса\* благоразумно уяснив,\* и тыя исполняя прилежно,\* положил еси, Василие,\* душу твою за други твоя.

Стих: Праведник яко финикс процветет, яко кедр, иже в Ливане, умножится.

Безчисленных чудес\* и изцелений чающе,\* собираемся вси ныне\* у иконы святого,\* и приемлем токи благодати.

Стих: Насаждени в дому Господни, во дворех Бога нашего процветут.

Вся, яже на земли,\* во уметы вменив,\* возжелал еси, отче, небеснаго,\* еже уллучив,\* молишися непрестанно о нас.

Слава, глас тойже.

Приидите, восприимем свет,\* истекающъ от иконы священномученика Василия,\* и, просветившеся сиянием Божественным,\* узрим величество Господа,\* во святых Своих дивнаго.

ТРОПАРЬ, глас 1

Святое житие твое\* украсив венцем мучения,\* возшел еси, радуясь,\* к небесным обителем.\* И ныне, предстоя Святей Троице,\* священномучениче Василие,\* моли за град Твой,\* и вся люди, совершающия память Твою.

## **НА ВЕЛИЦЕЙ ВЕЧЕРНИ**

На Господи, воззвах: Стихиры, глас 6. Подобен: Ангельския предыдите

Ангельския приидите силы,\* уготовайте венец:\* Василий бо мученик приходит\* от земли к небесным,\* приемлет от святых целование\* на радость всем нам.\* Людие, рцем:\* благословен дивный во святых\* Боже наш, слава Тебе.

Умныя грядите воинства,\* сретайте вам подобнаго\* святаго Василия,\* иже на земли ангелоподобно поживе,\* ныне же прият мзду трудов своих\* на небеси,\* и оттуду призывает\* паству свою\* пети непрестанно:\* Боже наш, слава Тебе.

Безплотных полки, тецые,\* украсите кринами\* святую икону\* дивнаго страстотерпца.\* Паче же изыщите с трепетом\* безвестное место погребения его,\* и, лобзающе, умастите ароматами тело многострадальное,\* и пойте непрестанно:\* Боже наш, слава Тебе.

Небесныя силы, идите,\* возвестите во всей вселенней\* славу священномученика,\* иже паству свою добре упасе,\* еще же и мучения прияв,\* разруши безбожных шатания,\* верных же всех\* верно научил пети:\* Боже наш, слава Тебе.

Ангельския предыдите силы,\* принесите моления наша\* ко Престолу Владычню;\* Той бо, ради благодости Своея,\* и молитв ради Василия,\* дарует нам грехов прощение\* и жизнь вечную,\* подвизая благодарственно вопити:\* Боже наш, слава Тебе.

Слава, глас 4. Самогласен:

Иже от не сущих\* во еже быти приведый вся,\* и сотворивый человека по образу Твоему и подобию,\* не оставил еси создания Своего умерша грехом,\* Сам Себе жертву предложив,\* и Своим воскресением живот вечный дарова,\* укрепил еси, Боже, полки страдальцев,\* свидетельствующих о Тебе,\* от нихже Василия ныне поем,\* восхваляюще Дивнаго во святых Своих Господа.

Чтения три:

Пророчества Исаиина чтение

Также глаголет Господь: вся языцы собращася вкупе, и соберутся князи от них. Кто возвестит сия в них? или яже от начала, кто слышана сотворит вам? да приведут свидетели своя, и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и Отрок, Егоже избрах, да познаете и веруете Ми, и разумеете, яко Аз есмь: прежде Мене не бысть ин бог, и по Мне не будет. Аз есмь Бог, и несть разве Мене спасающий. Аз возвестих, и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь: и несть от рук Моих избавляющий. Сотворю, и

кто отвратит то? Сице глаголет Господь Бог, избавляяй вас Святый Израилев.

### Премудрости Соломоновы чтение

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси их, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры по стеблию потекут. Судят языком, и обладают людьми, и воцарится Господь в них во веки. Надеющийся нань, разумеют истину, и вернии в любви пребудут Ему: яко благодать и милость в преподобных Его, и посещение во избранных Его.

### Премудрости Соломоновы чтение

Праведницы во веки живут, и в Господе мзда их: и попечение их у Вышняго. Сего ради примут царствие благолепия, и венец доброты от руки Господни: зане десницею покрывает я, и мышцею защитит их. Примет всеоружие

рвение свое, и вооружит тварь в месть врагом. Облечется в броня правды, и возложит шлем, суд нелицемерен. Приимет щит непобедимый преподобие. Поострит же напрасный гнев во оружие: споборет же с ним мир на безумных. Пойдут праволучныя стрелы молниины, и яко от благокругла лука облаков, на намерение полетят. И от каменометных ярости исполнь падут грады. Вознегодует на них вода морская, реки же потопят я нагло. Сопротив станет им дух силы, и яко вихор развеет их, и опустошит всю землю беззаконие, и злодейство превратит престолы сильных. Слышите убо царие, и разумеите, навикните судии концев земли. Внушите держащии множества, и гордящися о народех языков, яко дана есть от Господа держава вам, и сила от Вышняго.

### НА ЛИТИИ:

Стихиры, глас 2. Подобен: Доме Евфрафов.

Радости духовныя\* днесь исполняемся:\* се бо, память\* священномученика Василия\* нам светло возсия.

Торжествуй,\* земле Полтавская,\* прославляющи память\* дивнаго Твоего пастыря\* и велия мученика.

Претерпев мучения\* во святой и великий день,\*  
ныне безсмертныя трапезы\* наслаждаешься,\*  
Василие божественный.

Яко победоносец,\* яко воевода\* Царя  
Небеснаго,\* является нам днесь\* Василий  
царственноименитый.

Слава, глас 1. Самогласен:

Василием наречен быв,\* и царственного  
священика дело совершив,\* ныне в чертозех  
Царствия Горняго водворяешься,\* отче  
священнейший.\* Не презри молений наших,\*  
вознеси их ко Господу,\* испроси нам  
неколеблемый мир,\* Церкви единение,\* и душам  
нашим велию милость.

На стиховне: стихиры, глас 8. Самогласны.

Гонение неправедное и заточение,\* и нуждную  
смерть\* претерпел еси, отче,\* памятуя  
непрестанно\* слова Господни,\* яко мзда твоя  
многа на небесех.

Стих: Праведник яко финикс процветет, яко  
кедр, иже в Ливане, умножится.

Яко второй Илия,\* предстал еси правителем  
беззаконным,\* и посрамил еси тех ложная

мудрования,\* памятью присно,\* яко мзда твоя  
многа на небесех.

Стих: Насаждени в дому Господни, во дворех  
Бога нашего процветут.

Духовное торжество совершающе\* в пениих и  
песнях духовных,\* ублажаем святаго Василия,\*  
тому поюще:\* радуйся, священномучениче  
терпеливодушный,\* яко мзда твоя многа на  
небесех.

Слава, глас 5. Самогласен.

Радуйся, Василие,\* пастырю наш добрый\* и  
молитвенниче теплый о граде нашем,\* радуйся,  
веры правило,\* радуйся, мужества образе,\*  
радуйся, терпения мерило;\* не забуди в  
молитвах паству твою.

Тропарь, глас 1

Святое житие твое\* украсив венцем мучения,\*  
возшел еси, радуясь,\* к небесным обителем.\* И  
ныне, предстоя Святей Троице,\*  
священномучениче Василие,\* моли за град  
Твой,\* и вся люди, совершающия память Твою.

## НА УТРЕНИ

По кафисмах: седален, глас 4. Подобен:  
Вознесыйся.

Вознесшемуся на Крест волею\* и стяжавшему на  
достояние Себе\* честною Своею кровию,\*  
Христу Господу,\* подобитися желая, Василие,\* и  
мучения претерпев,\* Небеснаго Отечества  
достигл еси.

Ин седален, глас 1. Подобен: Спаси, Господи,  
люди Твоя.

Спаси, Господи, Люди Твоя,\* и благослови  
достояние Твое,\* молитвами святаго мученика\*  
и богомудраго архипастыря Василия.

Богородичен, глас тойже.

Всесильными молитвами Твоими, о Пречистая  
Богородице,\* защити нас во обстояниих,\* и  
испроси нам у Сына Твоего\* спасение и жизнь  
вечную.

Полиелей.

Величание: Величаем тя,\* святыи  
священномучениче Василие,\* и чтем святую  
память твою,\* ты бо молиши о нас Христа Бога  
нашего.

По полиелеи: седален, глас 6. Подобен:  
Ангельския силы.

Ангелов воинства снидошася\* к месту  
преставления твоего,\* и, трепетом обдержими,\*  
друг ко другу глаголаху:\* како сей, человек сый,\*  
пачечеловеческия мучения терпит,\* како силы  
изыскует глаголати:\* Господи, слава Тебе.  
(Дважды)

Слава, и ныне: Богородичен, глас тойже

Радуйся, Ходатаице спасения нашего,\*  
породившая нам Христа Господа;\* радуйся,  
Мосте,\* преводяй к райским обителем; радуйся,  
святителей радование;\* радуйся, мучеников  
укрепление.\* Молися со святым Василием к  
Сыну Твоему\* о спасении нашем.

Степенна: 1-й антифон 4-го гласа, От юности  
моя:

Прокимен: Честна пред Господем\* смерть  
преподобных его.

Стих: Что воздам Господеви о всех, яже воздаде  
ми.

Евангелие: Лк. 64

По Евангелии: Стихира, глас 6. Самогласен.

Днесь пророческое слово исполняется,\* днесь  
восхваляется преподобный в житии,\* и  
процветает яко финикс\* во дворех Бога нашего\*  
страстотерпец предивный\* и пастырь добрый,\*  
Василий богомудренный,\* смиреннейший на  
земли,\* и со Христом в Царствии горнем  
пребывающий,\* и молящийся о всех нас.

КАНОН, глас 6,

егоже краегранесие (без ирмосов):

БОГОМУДРАГО СВЯЩЕННОМУЧЕНИКА  
ВАСИЛИЯ ПОЮ.

Песнь 1.

Ирмос: Сеченое сечется море Чермное,\*  
волнопитаемая изсушается глубина:\* таяжде  
купно безоружным бывши проходима,\* и  
всеоружным гроб.\* Песнь же богокрасная  
воспевашесе:\* славно прославися Христос Бог  
наш.

Богомудра хошу восхвалити Василия, егоже  
Господь яви венценосна страдальца и велика  
пастыря. Темже прошу тя, священномучениче,  
испроси у Бога ми слово твердо, и ум чист, да  
пою, яко в тебе славно прославися Христос Бог  
наш.

Очервлены ризы твоя святительския, Василие, токами кровей твоих, и убелены благодатию Божественною, и сам еси светел и чист предстоиши ныне у престола Господня, вопия: славно прославися Христос Бог наш.

Горя желанием послужити Христу, весь себе Богу от юности возложь, пострадал еси, Василие, законно при кончине жития твоего, воспевая: славно прославися Христос Бог наш.

Богородичен:

Обитель Бога была еси, Дево, и паче слова Материю Слова, и паче естества питала еси Творца Твоего и Питателя; темже Тя молю: исходатайствуй и мне, Марие Чистая, очищения моих пачеестественных грехов и страстей.

### Песнь 3.

Ирмос: Господь сый всех и Зиждитель Бог,\* созданное Безстрастный обнищав Себе соедини,\* и Пасха за яже хотяше умерети,\* Сам сый Себе предпожре:\* ядите, вопия, Тело Мое,\* и верою утвердитесь.

Моисейскую ревность и тогожде кротость прият святой Василий, и во вся оружия правды оболкся, низложи злочестивых хуления, вопия: покайтесь, и верою утвердитесь.

Ужасом содержи́ма па́ства твоя́ моли́тву де́яше, егда́ ви́де тя на су́дище непра́ведно вле́кома; егда́ же па́ки прише́л еси́ во е́же па́сти лю́ди твоя́, ты́я в ра́дости гла́голаху: зрите́ чуде́ Бо́жие, и ве́рою утве́рдите́ся.

Да́ры Святы́я прино́ся о́ всех и за́ вся, очи́стил еси́ се́бе, Васи́лие, Кро́вию Хри́стовою, и́ всяко́ терни́е греха́ по́палив у́глем Те́ла Бо́жественна́го, во́склицал еси́ к па́стве твое́й: со́ страхом Бо́жиим, ве́рою и лю́бовию к святы́м Та́йнам присту́пите, и ве́рою утве́рдите́ся.

Богородичен:

Ра́дование А́нгеловым це́лованием при́яла еси́, Преобра́дованная, и́ во чре́ве за́ченши А́гнца Непо́рочна, Ма́терию То́го наре́клася, И́же Тебе́ сотвори́. Умо́ли же́ Сы́на Твое́го ра́дости прича́стника и́ мя сотвори́ти, и́ изъ́яти от греховных ско́рбей.

Седа́лен, гла́с 6:

А́нгельское́ житие́ на зе́мли совер́шив,\* и́ муче́ние прете́рпев,\* во́спри́ял еси́, Васи́лие,\* в Ца́рствии Не́беснем мзду́ трудо́в твои́х.\* Не забу́ди и́ нас, па́ству твою́,\* и́ испроси́ нам у́ Го́спода\* спа́сения ве́лию ми́лость.

Богородичен, глас тойже:

Госпоже Дево Богородице,\* щедрот  
неизследимая пучино,\* и милости бездно!\*  
Умоляем Тя ныне мы, недостойнии,\* молися ко  
Господу\* со священномучеником Василием,\*  
улучити нам спасения велию милость.

#### Песнь 4.

Ирмос: Провидев пророк тайну Твою  
неизреченную Христе, провозгласи:\* положил  
еси твердую любовь крепости, Отче Щедрый:\*  
Единороднаго бо Сына, Благий,\* очищение в  
мир послал еси.

Отцу Сына Собезначальна и Духа Равночестна и  
Сопрестольна, Троицу едину существом и  
раздельну Лицы проповедал еси, отче Василие.  
Наставляемъ же Духом Святым, ко Отцу  
непрестанно взывал еси: Единороднаго бо Сына,  
Благий, очищение в мир послал еси.

Сердце чисто созда Господь во святем Василии;  
того бо ради и богословствова архипастырь  
Божественне, уясняя неизреченныя тайны  
Божества, и яко пророк древле, взываше:  
Единороднаго бо Сына, Благий, очищение в мир  
послал еси.

Вознесе ум ко Пребожественным царственный священник Василий, и досточудно поучаше в Дусе ко Отцу глаголати: Единороднаго бо Сына, Благий, очищение в мир послал еси.

Богородичен:

Явися Тобою Господь в мир в рабии зраце, да нас от работы горькия измет, и Тя яви Свою Матерь, аки бы кладезь некий, от негоже всяк пьющий восприемлет токи благодати, аще токмо с верою притекает.

### Песнь 5.

Ирмос: Союзом любве связуеми апостоли,\*  
Владычествующему всеми себе Христу  
возложше,\* красны ноги очищаху,\*  
благовествующе всем мир.

Щедрому и Милостивому Господу твоему  
подражая, коегождо возлюбил еси, отче  
священнейший, и о спасении душ попечение  
имея, радостно текл еси со апостолы стезею  
Евангельскою, благовествующе всем мир.

Еже о нас закланному себе принесл еси, о  
Василие царственноимените, и в Царствии  
Небеснем вселился еси, вся глаголы Господни  
исполняя, яко сущий друг Божий; ныне же яко  
жив zde предстоиши, укрепляя данною ти

благодатию души наша, благовествующе всем мир.

Никакоже отступая пути праваго, богоборческое шатание низложил еси, Василие, сиянием святости твоея мглу греховную просвещая, и вкупе с мученики благовествующе всем мир.

Богородичен:

Никтоже возможет изрещи и капли от моря чудес Твоих, Чистая, никтоже и песни сложити Тебе достойныя дерзнет; обаче приими наше убогое пение, и излей на вся люди милости Твоя обильно.

### Песнь 6.

Ирмос: Бездна последняя грехов обыде мя,\* и волнения не ктому терпя,\* яко Иона Владыце вопию Ти:\* от тли мя возведи.

Огнь возжег в сердце своем ревности яже по Бозе, и не убоявся страданий купно же и клеветы, уготова Василий себе обитель Духа Святаго, ничтоже отвецавая на поношения, обаче, якоже Павел древле, себе мя первым от грешник, смиренно ко Господу глаголаше: от тли мя возведи.

Мужески ополчаяся противу козней  
диавольских, покаянием себе предуготовав к  
мучениям, взывал еси, отче Василие, ко  
Владыце: от тли мя возведи.

Ужасаюся изреци, каковыя страдания телесныя  
претерпе священномученик, егда ввержен бысть  
в бездну смрадну и зловонну. Взираю же на  
бездну грехов моих, токмо и молюся, глаголя:  
Василия молитвами, Господи, от тли мя возведи.

Богородичен:

Чистая Голубице Непорочная, Дево  
Неискусобрачная, молися к Сыну Твоему и  
Господу, очистиши мя от всякия скверны.

Кондак, глас 4.

Елеем милости Христовы всяку душу  
уврачевав,\* и растерзав яко паучину козни  
велиаровы,\* копием Слова Божия диавола  
умертвил еси, святе,\* и прославился еси в  
Царствии Небеснем,\* отче священнейший.

Икос:

Нем ко лживым словесем,\* и глух являясь ко  
оглаголению,\* не таяся отверзал еси уста твоя в  
защитение истины,\* и во утешение печальных,\*  
и в проповедании Евангелия;\* и тако вторый

Василий Великий явился еси,\* отче  
священнейший.

### Песнь 7.

Ирмос: Отроцы в Вавилоне пещнаго пламене не  
убояшася, но посреде пламене ввержени,  
орошаеми пояху: благословен еси, Господи Боже  
отец наших.

Имже образом желает елень на источники  
водныя, возжелел еси, отче, Горнейшаго  
Царствия, егоже ради вся дольняя презрев,  
смерти вкушением жизнь вечную обрел еси,  
взывая: благословен еси, Господи, Боже отец  
наших.

Камень неколеблемый Христа в сердце Твоем  
положив, возвел еси на Том храм души твоея,  
Василие, от ветров сопротивных невредимый и  
водами нечестия нерушимый; егда же бури  
злобныя на тя налегаху, точию взывал еси:  
благословен еси, Господи, Боже отец наших.

Апостольскою стезею шел еси, отче, просвещая  
сердца верных Духом Божественным, Егоже  
дарований обильных сам сподобился еси; и  
научая коегождо взывати: благословен еси,  
Господи, Боже отец наших.

Богородичен:

Велия слава Твоя, славно и величество Твое, о Мати Безмужная, и неизреченно море чудес Твоих, от негоже ми каплю уллучити молюся.

### Песнь 8.

Ирмос: За законы отеческия блаженнии в Вавилоне юноши предбедствующе, царюющаго оплеваша повеление безумное, и совокуплени имже не сваришася огнем, державствующему достойную воспеваху песнь: Господа пойте, дела и превозносите во вся веки.

Агнца себе уготовал еси, Василие, в жертву Богови, восклицая: Господа пойте, дела, и превозносите во вся веки.

Страха не имея ниже трепета, повергся в блато смрадное священный мученик, и вниде в светлыя чертоги Небесныя, взывая: Господа пойте, дела, и превозносите во вся веки.

Ина слава солнцу и ина луне; такожде и оваго святаго мощи всяк возмогает лобзати, твое же, Василие, честнейшее и многострадальнейшее тело точию Бог вестъ, где лежит. Обаче кланяемся пред иконою твоею святою, яко самому тебе сущу с нами, и величающе дивнаго

во святых Своих Бога, зовем: Господа пойте, дела, и превозносите во вся веки.

Богородичен:

Леностию греховною омрачен, и недугами страстными обложен, камо бежу или к кому возопию? токмо, по Бозе, к Тебе, Дево Богородице. Тя прошу: помози ми, недостойному, избави мя от мук молитвами Твоими.

### Песнь 9.

Ирмос: Странствия Владычня, и бессмертныя трапезы на Горнем Месте, высокими умы, вернии приидите насладимся, возшедша Слова, от Слова научившеса, Егоже величаем.

Иоанна восприемь Предтечу яко соратника, и Илию споборника, устремился еси, Василие, на тьмы безбожных врагов с мечем веры, плевелы посекая и всех научая веровати в Бога Истиннаго, Егоже величаем.

Язык умолкает восхвалити по достоянию все терпение твое и мужество, святе, имиже всяк язык просветил еси, ведуще, яко несть скиф ниже иудей, ниже елин для Господа, Егоже величаем.

Преподобен в житии, злат в словесех, велик в мужестве явился еси, Василие, смиренно служа Богу Единому, Егоже величаем.

Богородичен:

Образ Твой древле видев патриарх яко лествицу, на нейже Господь утверждашеса; ныне же, ликующе, купно со всеми пророки, рцы, Иакове: радуйся, Дево, пророческое сбытие; радуйся, Еюже Господь на землю сниде; радуйся, Ковчеже Завета Вечнаго; радуйся, Истинная Богородице и Приснодево.

Светилен:

Юже древле Давид прорече, приял еси, Василие, смерть честну пред Господем, яко преподобный и праведный, потщався же Богови воздати и житие твое, обрел еси мзду болезней твоих в Светлом Царствии Небеснем.

На хвалитех: стихиры, глас 1. Подобен:  
Небесных чинов.

Невещественных житию поревновав,\* яко Михаил Архистратиг\* устремился еси на диавола,\* и того под ногу поправ,\* торжествуя, Василие, взывал еси:\* кто, яко Бог наш!

Окружаемь Силами небесными,\* совершал еси,  
отче, Святыя Тайны,\* серафимским желанием\* к  
Богу пламенея,\* и мужески ко своей кончине  
потекл еси,\* и со святыми водворяешися.

Пред Престолом Господним\* со святыми Ангелы\*  
ныне предстоит Василий,\* и возносит молитвы о  
всех нас,\* совершающих память его\*  
благочестно.

Трисвятому пению\* еще на земли научився,\*  
устремился еси, Василие,\* во еже лицезрети  
Бога,\* от ангелов немолчно\* и благолепно  
славословимаго.

Слава, глас 8. Самогласен.

Богови от юности поработав,\* и священствовав  
непорочно,\* и венец святительский\* от руку  
блаженнаго Григория приим,\* сподобился и  
венца мученическаго, славне Василие,\* и  
ликуеши со всеми святыми,\* моляся  
непрестанно и спасении нашем.

На стиховне:

Слава, глас 1. Самогласен.

Святому житию твоему\* како не дивимся,  
Василие,\* како достойную ти хвалу принесем?\*

Припадаем ти ныне, ведуще,\* яко ничтоже

творим достойно\* святости и мужеству твоему;\*  
Обаче зовем ти:\* помяни нас в молитвах твоих\*  
к Богу в Троице славимому,\* Емуже на земли  
служил еси,\* и ныне Его светом просвещаешься.

## **НА ЛИТУРГИИ**

Прокимен, глас 7:

Восхваляются преподобнии во славе,\* и  
возрадуются на ложах своих.

Стих: Воспойте Господеви песнь нову, хваление  
Его в Церкви преподобных.

Апостол: Евреем, зачало 334.

Аллилуиа, глас 2.

Стих: Священницы Твои оденуты в правду, и  
преподобнии Твои возрадуются.

Стих: Надеющийся на Господа яко гора Сион: на  
подвижится в век Живый во Иерусалиме.

Евангелие: От Луки, зачало 67.

Причастен: В память вечную будет праведник,  
от слуха зла не убоится.